

1. UVOD

Ovaj diplomski rad se temelji na analizi propisa koji uređuju pitanja koja se odnose na ustanove za izvršenje krivičnih sankcija i uopće izvršenje krivičnih sankcija i drugih mjera sudova u Bosni i Hercegovini. Dakle, izučavati će se zakoni i podzakonski akti BiH, entiteta Republike Srpske i Federacije BiH te Brčko Distrikta BiH, relevantnih međunarodnih dokumenata i preporuka institucija u čijoj je nadležnosti praćenje rada ustanova za izvršenje krivičnih sankcija.

Glavnu hipotezu rada predstavlja jedna tvrdnja odnosno zaključak do kojeg sam došao prije detaljnijeg upoznavanja sa temom rada i to na osnovu novinskih i internetskih članaka, a taj zaključak jeste da u Bosni i Hercegovini ne nedostaje propisa koji uređuju pitanja izvršenja krivičnopravnih sankcija, ali da svakako nedostaje ustanova za izvršenje sankcija, mjera koje se izriču maloljetnim učiniocima kažnjivih djela, da u postojećim nedostaje smještajnih kapaciteta, da iza svih tih problema stoji problem nedostatka finansijskih sredstava, a sve se to u konačnici odražava i na dosljedno poštivanje propisa i međunarodnih standarda u izvršenju krivičnih sankcija i drugih mjera.

Cilj rada je analizirati spomenute akte i na osnovu toga dokazati hipotezu rada, dati argumente koji je dokazuju i ponuditi rješenja problema postavljenog u hipotezi.

Za potrebe rada primjeniti će se, prije svih, metoda analize kako bi se mogli izučiti mnogobrojni propisi koji regulišu datu materiju i odabrati one odredbe zakona, pravilnika, deklaracija i sl. koje su neophodne da bi se u krajnjem rezultatu, primjenom metode sinteze, mogli dobiti pravilni zaključci. Sa istim ciljem koristiće se i metoda klasifikacije radi razvrstavanja unutrašnjih i međunarodnih izvora prava, vrsta ustanova za izvršenje krivičnih sankcija u BiH, ovlaštenja zaposlenih u ovim ustanovama i prava i dužnosti osoba nad kojima se krivičnopravne sankcije izvršavaju, a onda i metoda komparacije radi usporedbe pravnih instrumenata kako bi se dobili što relevantniji i tačniji podaci.

Očekivani praktični doprinos ovog diplomskog rada je ne samo produbljenje stečenog sopstvenog znanja o dijelu predmeta izučavanja penologije kao nauke, nego i prezentovanje odabrane materije na jasan, koncizan i pregledan način, tako da se zainteresirani čitalac kojeg zanimaju osnovne informacije o ustanovama za izvršenje krivičnih sankcija u Bosni i Hercegovini jednostavno i brzo može snaći u mnoštvu propisa koji uređuju ovu oblast prava.

Pitanja koja se razmatraju u ovom radu i koja su uređena propisima koji će se analizirati, ujedno predstavljaju i osnovne odrednice rada prikazane u njegovim poglavljima.

Kao prvo kod ove teme, prirodno se postavlja pitanje šta su to i koje su ustanove za izvršenje krivičnih sankcija i drugih mjera u Bosni i Hercegovini? U svrhu davanja odgovora na to pitanje, međutim, potrebno je najprije u kratkim crtama predstaviti propise koji će se u ovom radu izučavati.

Nadalje se obrađuje organizacija ovih ustanova, kako tehnička, tako i organizacija radnih mjesta, koji su to zadaci ustanova i njihovih zaposlenika.

U nastavku rada, kroz važeća zakonska rješenja, biti će prikazan tok postupka izvršenja krivičnih sankcija i drugih mjera koji počinje u sudovima na nivou BiH, entiteta i Brčko Distrikta i završava se u ustanovama za izvršenje krivičnih sankcija.

Posljednji dio odnosno poglavlje rada bavi se pitanjem poštivanja ljudskih prava u ovim ustanovama, postupanja sa licima nad kojima se izvršavaju krivične sankcije i druge mjere, njihovih prava, dužnosti, pogodnosti koje mogu koristiti, zatim pitanjem standarda zaštite ljudskih prava ovih lica prema međunarodnim dokumentima i preporukama Ombudsmana za ljudska prava Bosne i Hercegovine.